

Drs. Mervin Wyatt-Ras:

Reconstruccion y renobacion di dr. Horacio Oduber Hospital mester bay man den man cu miho calidad di cuida na e pashent

DURANTE e reunion publico ayera y antayera cu a trata e ley di apoderacion di gobierno pa por cera un acuerdo cu SOGA pa reconstruccion y renobacion di hospital dr. Horacio Oduber, parlamentario independiente, drs. Mervin Wyatt-Ras a trece padilanti su preocupacion pa e calidad di servicio di hospital.

E parlamentario aki a haci diferente pregunta critico na gobierno. Esta a base di ki argumento a dicidi di scoge pa mesun lugar cu hospital ta actualmente en bes di un sitio mas central di Aruba. Esaki a base di e hecho cu esunnan cu ta biba pariba tin cu pasa oranan largo o sea den auto of haciendo uzo di transporte publico prome cu nan yega hospital. Otronan tin cu core solamente 5 pa yega. E consecucionan financiero ta entre otro cu gobierno lo mester paga 2 milyon. E parlamentario a puntra pa gobierno cuanto lo mester paga pa luna y si e suma a keda 2 milyon of si e la subi.

E parlamentario a puntra dicon ta cera e acuerdo cu SOGA so, y si tabatin otro opcion, cual opcion.

Mervin Wyatt-Ras como presidente di e comision di salubridad a organisa diferente presentacion unda minister y tambe hospital a splica nan maneho ariba e tereno di salubridad. Aki por a compronde cu hospital ta trahando ariba diferente cambio di e calidad di servicio. Ta keda ainda e servicio di Emergencia cu nos hendenan te ainda ta experiencia como no eficiente, rapido y cualitativo. Recientemente a ser publica den corant cu un persona despues di a keda pa oranan largo ta warda a haya complicacion y a fayece. Ademas ta ser experiencia ora cu ta trata di pashentnan di edad e atencion pa cu nan no ta uno optimal. Aki e parlamentario a expresa su preocupacion pa mehoracion den esaki. Durante un presentacion na Parlamento a ser treci dilanti cu construccion di e hospital lo bay conhuntamente cu un vision y e vision a keda a keda presenta. Wyatt-Ras a puntra di ya caba a yega na un decision riba cual specialismo HOH lo enfoca y riba cual IMSAN.

E parlamentario a enfoca alavez ariba e importancia di duna informacion na e pashent, cu esaki ta un derecho di e pashent y cu tin hopi reclamo ariba e topico aki. Alavez e cooperacion entre specialistanan cu den varios ocasion no ta bay manera cu mester ta. Segun e parlamentario e la experiencia ultimo un bon cooperacion di parti di e expertonan di long, sin embargo e kehonan ta varios pa loke e transmision di informacion di un especialista pa otro den bienestar di e pashent. Tambe e kehonan encuanto e tempo cu e pashent tin cu warda prome cu e por haya un cita cu un especialista y si esaki lo mehora. A puntra alavez si den e edificio tin un espacio unda specialistanan por topa pa asina consulta cu otro den bienestar di nan pashentnan. E parti di keho di e pashent ora e no ta contento cu e servicio of cuida tambe ta keda un punto cu ta rekeri di atencion. Di varios pashent por compronde cu ora nan duna un keho di algo cu no ta bay bon segun nan cu nan no ta tende nada mas despues. Esaki ta haci cu e pashent no ta duna keho ora e no ta di acuerdo cu algo y ta haci cu e chens pa mehoracion di e cuida tambe ta keda limita. E parlamentario a trece padilanti su preocupacion pa e vergrijzing di personal di enfermeria y

cu mester haci uzo di e gran conocimiento di e enfermero(a)nan cu tin experiencia y pasa esaki over na esunnan cu ta inicia nan carrera. E la puntra ki tempo lo inicia cu e estudio di enfermeria avansa den cooperacion cu universidad di Aruba y kico lo sosode pa loke ta trata tur esunnan cu studia enfermeria na EPI, si nan lo por ser coloca.

E parlamentario a trece padilanti cu e

cantidad di enfermero ariba e pashentnan no ta suficiente en special ora ta trata pashentnan cu mester di mas ayudo, p.e. pashentnan cu demencia of alzheimer. Pregunta ta ki dia y cu cuanto lo aumenta e cantidad di profesionalnan di enfermeria ariba piso. Esaki sigur lo facilita e trabao di e personal di enfermeria.

E parlamentario a puntra alavez encuanto di e ley cu lo reglamenta registracion di BIG y kico ta opinion di e personal di enfermeria pa loke ta trata e ley aki y ki tempo por spera dicho ley den parlamento. Finalmente Wyatt-Ras a entrega un mocion pa asina amplia e cuida di pashentnan na cas.

